



J-KOM kini diselia Kementerian Komunikasi - Fahmi

Oleh Mohd Iskandar Ibrahim - Disember 13, 2023 @ 3:29pm
mohd_iskandar@bh.com.my

PUTRAJAYA: Jabatan Komunikasi Komuniti (J-KOM) yang sebelum ini di bawah Jabatan Perdana Menteri, kini diselia Kementerian Komunikasi.

Menteri Komunikasi, Fahmi Fadzil, berkata keputusan itu diputuskan dalam mesyuarat Jemaah Menteri dipengerusikan Perdana Menteri, Datuk Seri Anwar Ibrahim, hari ini, susulan rombakan Kabinet dan perubahan fungsi beberapa kementerian.

Selain J-KOM, katanya, Pertubuhan Berita Nasional Malaysia (BERNAMA), Institut Penyiaran dan Penerangan Tun Abdul Razak (IPPTAR), Jabatan Penerangan (JaPen), Jabatan Penyiaran, Perbadanan Kemajuan Filem Nasional (FINAS), Suruhanjaya Komunikasi dan Multimedia (MCMC) dan MyCreative Ventures dikekalkan di bawah Kementerian Komunikasi.

"Ada satu agensi yang dibawa masuk ke dalam Kementerian Komunikasi ialah J-KOM. Perkara ini diputuskan dalam mesyuarat Jemaah Menteri hari ini," katanya pada sidang media di sini, hari ini.

Fahmi yang juga jurucakap Kerajaan Perpaduan berkata, Perbadanan Ekonomi Digital Malaysia (MDEC), MYNIC Bhd dan Jabatan Perlindungan Data Peribadi akan dipindahkan ke Kementerian Digital yang diketuai Menterinya merangkap Ahli Parlimen Damansara Gobind Singh Deo.

"Mengenai Digital Nasional Bhd (DNB) masih ada perbincangan dan akan diputuskan kemudian.

"Mesyuarat Jemaah Menteri hari ini turut membincangkan mengenai agensi yang akan ditempatkan di kementerian berkaitan susulan penstrukturan semula seperti diumumkan Perdana Menteri.

"Bagaimanapun, ia belum diputuskan dan saya tidak boleh menyatakan lebih daripada itu sehingga apa yang disebut sebagai 'Ministerial Function Order' diwartakan yang kita jangka sehingga Januari 2024," katanya.

Mengenai Kementerian Digital, Fahmi berkata, kementerian itu akan ditempatkan di Menara Usahawan di sini, manakala perbincangan mengenai proses pembentukan kementerian itu sedang berjalan dengan Ketua Setiausaha Negara, Tan Sri Mohd Zuki Ali.

Ditanya mengenai status pelantikan Ketua Pengarah baharu J-KOM, Fahmi menjelaskan, beliau belum sempat bertemu dengan agensi berkenaan.

"Jadi saya perlu beri mereka masa dan ruang untuk memberi taklimat dahulu sebelum saya beri perkembangan lanjut. Jadi kita tunggu dan beri beberapa hari untuk memuktamadkan beberapa perkara," katanya.